

鹿洲全集

戊辰仲春
重印 貳拾

鹿洲

金

集

卷

七

七

女學卷五

漳浦藍鼎元玉霖編

婦容篇

○班氏曰婦容不必顏色美麗也。盥浣塵穢。

服飾鮮潔。沐浴以時。身不垢辱。是謂婦容。

音盥

管澆胡管
切鮮平聲

右第一章。承首篇婦容而立言也。以下六十一章。雜引古人之言行以明之。

行去聲

○內則曰婦事舅姑。如事父母。雞初鳴。咸盥漱。櫛。縱筓。總衣紳。左右佩用。衿纓綦履。以適父母舅姑之所。及所下氣怡聲。問衣燠寒。疾痛苛癢。而敬抑搔之。出入則或先或後而敬扶持之。進盥。少者奉槃。長者奉水。請沃盥。盥卒。授巾。問所欲而敬進之。柔色以溫之。父母舅姑必嘗之而後退。節○漱先奏切搔音騷少去聲長上聲在父母舅姑之所。有命之。應唯敬對。進退周旋。慎齊升降。出入揖遊。不敢噦噫噓咳。欠伸跛

倚睨視不敢唾痰寒不敢襲癢不敢搔不有
敬事不敢袒裼不涉不擻褻衣衾不見裏父
母唾痰不見節○唯上聲齊音齋嚏丁計切
見俱音更凡婦不命適私室不敢退婦將有事大
小必請於舅姑。

右第二章。子夏問孝。孔子告以色難。
朱子曰。謂事親之際。惟色爲難也。又
曰。孝子之有深愛者。必有和氣。有愉
色。有婉容。婦人之事舅姑。亦若是焉。

爾矣。苟不極意承歡。而或直情徑行。疾言戾色。雖日用三牲之養。親亦不以爲孝也。述事親之容。自此以下凡

二章。

養去聲。

○昏義曰。夙興婦沐浴以俟見。質明贊見婦于舅姑。婦執筭。棗栗段脩。以見贊禮婦。婦祭脯醢祭醴。成婦禮也。舅姑入室。婦以特豚饋。明婦順也。

節。見俱音現。筭音煩。醢音海。

厥明舅姑共饗。

婦以一獻之禮奠酬。舅姑先降自西階。婦降

自降階以著代也。

右第三章。

○班氏曰。婦人之得於夫。非謂佞媚苟親也。固莫若專心正色。秉禮居潔。耳無塗聽。目無邪視。出無冶容。入無廢飾。無聚會羣輩。無闕視門戶。此則謂專心正色矣。若夫動靜輕脫。視聽狹淪。入則亂髮壞形。出則窈窕作態。說所不當道。觀所不當視。此謂不能專心正色也。若夫之夫音扶

右第四章。夫婦之好。不患不親。患其過於狎也。狎而敬之。畏而愛之。所謂有別。其在斯乎。別者禮也。人之所以異於禽獸者也。專心正色。相敬如賓。斯謂之禮。若彼亂髮壞形。窈窕作態。則非莊婦可知。見者將厭薄之矣。述敬夫之容。自此以下凡八章。

○內則曰。禮始於謹夫婦。爲宮室。辨內外。男子居外。女子居內。深宮固門。閨寺守之。男不

入女不出。男女不同。櫛。不敢縣於夫之櫛。
櫛。不敢藏於夫之篋笥。不敢共湣浴。夫不在。
斂枕篋簟席褥器而藏之。少事長。賤事貴。咸
如之。
櫛音移。枷音架。縣音懸。櫛音輝。
湣音逼。獨音獨。少去聲。長上聲。

右第五章。

○書大傳曰。后夫人將侍君。前息燭。後舉燭。
至于房中。釋朝服。襲燕服。然後入御于君。雞
鳴。太師奏雞鳴于階下。夫人鳴佩玉于房中。
告去也。然後應門擊柝告闕。少師奏質明于

階下。然後夫人入庭立。君出朝。

傳去聲朝俱音潮少去聲

右第六章。

○古者后夫人必有女史彤管之法。后妃羣妾以禮御於君所。女史書其環而進退之。生子月辰。則以金環退之。當御者著于左手。既御著于右手。左手陽也。以當就男。右手陰也。御而復故。

著俱音著

右第七章。

○禮曰。壻親御授綬。親之也。敬而親之。先王

之所以得天下也。出乎大門而先。男帥女。女
從男。夫婦之義。由此始也。節。帥入
聲音率共牢而
食。同尊卑也。故婦人無爵。從夫之爵。坐以夫
之齒。

右第八章。

○白季使過冀。見冀缺耨。其妻饁之。敬相待
如賓。與之歸。言之文公曰。敬。德之聚也。能敬
必有德。德以治民。君請用之。臣聞出門如賓。
承事如祭。仁之則也。文公以爲下軍大夫。
臣曰

九切使
去聲

右第九章。

○梁鴻適吳。依臯伯通。居廡下。爲人賃舂。鴻妻孟光進食。舉案齊眉。伯通異之曰。彼傭能使其妻敬之如此。非凡人也。乃舍之于家。以賓禮待之。爲去聲 賃音任

右第十章。

○五代裴從簡。聞許州富人有玉帶。欲之而不可得。遣二卒夜入其家。殺而取之。二卒夜

踰垣入見其夫婦相待如賓。二卒感歎曰。吾
今欲奪其寶而害斯人。吾必不免。因躍出而
告之。使其速以帶獻。長音

右第十一章。

○易曰。家人嗃嗃。悔厲吉。婦子嘻嘻。終吝。象
曰。家人嗃嗃。未失也。婦子嘻嘻。失家節也。各切
音塞

右第十二章。婦人起居。必有禮法。視
聽言動之間。無所苟而已矣。寧爲拘

謹勿爲放誕。寧過矜莊。勿爲嬉笑。靜
處深閨。養成令淑。無崇好佚遊。無出
入寺觀。無矜尚紛華。冶容麗飾。嘻嘻
終客之戒。吾知免夫。述起居之容。自
此以下。二十有一章。已音以好去聲
觀去聲夫音扶

○太公曰。婦人之禮。語必柔細。行必緩步。止
則斂容。動則跣跣。耳無餘聽。目無餘視。出無

諂容。

跣音祥跣
牀呂切

右第十三章。

○孟子曰。西子蒙不潔。則人皆掩鼻而過之。
雖有惡人。齊戒沐浴。則可以祀士帝。齊音齋

右第十四章。

○曲禮曰。毋側聽。毋噉應。毋淫視。毋怠荒。遊
毋倨。立毋跛。坐毋箕。寢毋伏。斂髮毋髢。冠毋
免。勞毋袒。暑毋褰裳。節○毋俱音無噉音咍髢音替玉藻
曰。足容重。手容恭。目容端。口容止。聲容靜。頭
容直。氣容肅。立容德。色容莊。

右第十五章。

○內則曰。男不言內。女不言外。非祭非喪。不相授器。其相授。則女受以篚。其無篚。則皆坐奠之。而後取之。

右第十六章。

○內則曰。女子出門。必擁蔽其面。夜行以燭。無燭卽止。節道路。男子由右。女子由左。

右第十七章。

○孔子曰。以之居處有禮。故長幼辨也。以之
節閨門之內有禮。故三族和也。
上聲申繻曰。

男有室。女有家。無相瀆也。謂之有禮。易此必敗。篇音

右第十八章

○荀爽女誡曰。七歲之男。王母不抱。七歲之女。王父不持。親非父母。不與同車。親非兄弟。不與同筵。

右第十九章

○詩曰。士之耽兮。猶可說也。女之耽兮。不可說也。